

## **Gemeng vum 21. Joerhonnert, Gemeng vu muer**

Am Oktober 2017 si Gemengewahlen zu Lëtzebuerg. An dem Kontext, huet sech d'CSJ Gedanke gemaach wéi Gemengen hei am Land am 21. Joerhonnert nach besser funktionéieren an hir Bierger besser an de politesche Prozess abanne kënnen. Dobäi muss een natierlech bedenken, dass ass all Gemeng duerch seng geographesch an demographesch Lag aner Suergen huet, doduerch anescht organiséiert ass. Verschidde Gemengen hu verschidde vun eise Proposen och schonn ageféiert oder experimentéieren domadder. Dowéinst sinn eis Proposen a Recommandatiounen an dësem Zesammenhang och mat dem néidege Pragmatismus an der néideger Flexibilitéit ze verstoen.

### **Eng modern a biergerno Gemengenadministratioun**

Wéi kann d'Gemeng vu muer méi einfach, méi direkt a méi effizient mat hire Bierger kommunizéieren? Wéi kann d'Gemeng sech méi effektiv an am Sënn vun de Bierger intern opstellen? A wéi kënnen sech d'Bierger an der Zukunft nach méi einfach iwwert Aktivitéite vun der Gemengen informéieren? Dozou schléit CSJ vir:

- En Internetsite a mindestens 2 Sproochen, am beschten deenen 3 administrative Sproochen hei zu Lëtzebuerg.
- D'Méiglechkeet niewent dem Guichet an der Gemeng, all administrativ Demarchen iwwert den Internet ofzewéckelen.
- De Gemeindebuet och elektronesch opzeschaffen an am Format vun enger Newsletter via Mail an iwwert sozial Media ze verbreedden. Dobäi sollen d'Gemeng an hir Clibb och heivu Gebrauch maachen, fir op kulturell Eventer an Aktivitéiten an den Dierfer vun der Gemeng hinzeweisen an ze invitéieren.
- All Gemeng muss en analytesche Bericht vun hire Gemengesetzung verfaassen an de Bierger iwwert Internet an am Gemeindebuet zur Verfügung stellen. Gemenge sollen encouragéiert ginn e Livestream (mat enger Play-back-Funktioun) vun der Gemengerotssetzung anzeféieren, sou dat Bierger sech informéiere kënnen.
- All Dokumenter déi de Bierger a Persoun bei der Gemeng consultéiere kann, sollen iwwert den Internet einfach accessibel gemaach ginn.
- Mir fuerderen eng Aféierung vun enger Gemengendirektioun, déi sech aus dem Sekretär, dem Chef vum Service Technique an dem Receveur zesummesetzt.

### **Participatioun an Integratioun vun de Bierger an der Gemeng**

Wei kënnen Bierger sech an der Gemeng besser abrénge? An wéi kënnen Gemenge Bierger besser un den Decisiounen bedeelegen? Dozou schloe mir vir:

- D' Aféierung vun engem Online-Petitioun-System (wéi dee bei der Chamber) fir de Bierger d' Méiglechkeet ze ginn op lokal Problemer opmierksam ze maachen.
- Obligatoresch Biergerconsultatioune (ëffentlech Versammlungen) bei grouse Bauprojeten an der Gemeng (bei PAG a verschiddene PAPen, wou nei Quartieren entstinn oder bestoend ëmgestalt ginn).
- Public-Maache vun de Rapporten aus alle Gemengekommissiounen, déi net „à huit clos“ gehale ginn.
- Nach méi Efforten ze maache fir all nei Matbierger (Lëtzebuenger an Net-Lëtzebuenger) an de Gemengen ze begréissen, hinnen hir nei Gemeng méi no ze bréngen a si ze integréieren, zum Beispill mat enger *Welcome Week* fir nei Bierger, dem Ausbau vun den Noperschaftsfest, perséinleche Welcome-Gespréicher vun de Gemengeresponsabel, etc.
- Gemenge sollen hire Bierger an de Leit, déi bei der Gemeng schaffen, gratis Lëtzebuergeschcours an der Mëttesstonn an owes no den Aarbechtszäiten ubidden.

### **Jonker an der Gemeng**

Wei eng Projete kann d'Gemeng fir Jonker maachen?

- D' Aféiere vun engem Kanner- a Jugendgemengerot an alle Gemengen.
- Dat obligatorescht Ofhale vun „Assises de la Jeunesse“ an engem 2-Joer-Rhythmus.
- D' Ausschaffe vun engem Jugendkommunalplang an alle Gemengen iwwer 10.000 Awunner.

### **Gemeng an d' Verriedung an der Chamber**

Wéi sollen déi lokal Interessen an der Zukunft um nationale Plang verriede ginn? Dozou fuerdert d'CSJ:

- De Cumul vun de Mandater tëschent dem lokalen an dem nationalen Niveau staark ze limitéieren.
- Eng obligatoresch Formatioun, organiséiert vum Staat fir déi nei Gemengeconseillere no der Wahl an de Prozedure vum Gemengerot, de relevante Gesetzer, souwéi e Rappell vun der Wichtigkeet vun hiner gewëssenhafter Aarbecht als politescht Aktiouns- a Kontrollorgan am Intressi vun de Bierger.
- De Congé politique vun de Gemengeverrieder eropzesetzen, fir dass si hirem Mandat gewëssenhaft kënnen nooen.
- D' Aféiere vun enger Chambre des élus locaux mat begrenztem Pouvoir fir weiderhin d' Interête vun de Gemengen zum Ausdrock kennen ze bréngen.

*Ugeholl um CSJ-Nationalkongress 2017 zu Beetebuerg*